



Comhairle an
Aontais Eorpaigh

An Bhruiséal, 31 Bealtaine 2017
(OR. en)

9479/17

Comhad Idirinstitiúideach:
2016/0363 (COD)

EF 102
ECOFIN 433
DRS 31
CODEC 872

NÓTA

ó:	Ardrúnaíocht na Comhairle
chuig:	Coiste na mBuanionadaithe/ an Chomhairle
Ábhar:	Togra le haghaidh Treoir ó Pharlaimint na hEorpa agus ón gComhairle lena leasaítear Treoir 2014/59/AE ó Pharlaimint na hEorpa agus ón gComhairle maidir le hionstraimí fiachais neamhurráithe a rangú in ordlathas dócmhainneachta (an chéad léamh) = Comhréiteach ón Uachtaránacht

Gheobhaidh na toscaireachtaí i gceangal leis seo an téacs comhréitigh críochnaitheach ón Uachtaránacht le haghaidh Coreper maidir leis an togra thuasluaite ón gCoimisiún.

2016/0363 (COD)

Togra le haghaidh

TREOIR Ó PHARLAIMINT NA hEORPA AGUS ÓN gCOMHAIRLE

**lena leasaítear Treoir 2014/59/AE ó Pharlaimint na hEorpa agus ón gComhairle maidir le
hionstraimí fiachais neamhurraithe a rangú in ordlathas dócmhainneachta**

(Téacs atá ábhartha maidir le LEE)

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 114 de,

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ón mBanc Ceannais Eorpach¹

Ag féachaint don tuairim ó Choiste Eacnamaíoch agus Sóisialta na hEorpa²,

Ag gníomhú dóibh i gcomhréir leis an ngnáthnós imeachta reachtach,

De bharr an méid seo a leanas:

¹ IO C , , lch. .

² IO C , , lch. .

(1) D'fhoilsigh an bord um chobhsaíocht airgeadais (FSB) bileog téarmaí ('caighdeán TLAC') an chumais iomláin ionsúcháin caillteanais (TLAC) ar an 9 Samhain 2015 agus d'fhorhnuigh G-20 é i Samhain 2015. Is é cuspóir chaighdeán TLAC a áirithiú i gcás bainc a bhfuil tábhacht shistéamach dhomhanda leo (G-SIBanna), dá ngairtear institiúidí a bhfuil tábhacht shistéamach dhomhanda leo (G-SIIanna) i gcreat an Aontais, "go bhfuil an cumas ionsúcháin caillteanais agus athchaipitliúcháin is gá acu chun a áirithiú, nuair a bheidh réiteach á dhéanamh agus díreach ina dhiaidh sin, gur féidir leanúint le feidhmeanna criticiúla gan cistí na gcáiníocóirí (cistí poiblí) ná cobhsaíocht airgeadais a chur i mbaol". Sa teachtaireacht uaidh an 24 Samhain 2015³, gheall an Coimisiún go gcuirfeadh sé togra reachtach chun cinn faoi dheireadh 2016, togra lena bhféadfaí caighdeán TLAC a chur chun feidhme faoin sprioc-am a comhaontaíodh go hidirnáisiúnta, mar atá 2019.

³ Teachtaireacht ón gCoimisiún chuig Parlaimint na hEorpa, chuig an gComhairle, chuig an mBanc Ceannais Eorpach, chuig Coiste Eacnamaíoch agus Sóisialta na hEorpa, agus chuig Coiste na Réigiún, "I dtreo an tAontas Baincéireachta a thabhairt chun críche", 24.11.2015, COM(2015) 587 final

(2) Nuair a bheifear ag cur chaighdeán TLAC chun feidhme san Aontas, ní mór an t-íoscheanglas institiúid-sonrach atá ann cheana maidir le cistí dílse agus dliteanais incháilithe ('ICDI') a chur san áireamh, íoscheanglas is infheidhme maidir le hinstitiúidí uile an Aontais mar a leagtar síos i dTreoir 2014/59/AE ó Pharlaimint na hEorpa agus ón gComhairle⁴. Ós rud é go bhfuil an t-aon chuspóir amháin ag TLAC agus ag ICDI, mar atá a áirithiú go mbeidh cumas leordhóthanach ionsúcháin caillteanais agus athchaipitliúcháin ag institiúidí an Aontais, ba cheart an dá cheanglas a bheith ina ngnéithe comhlántacha de chomhchreat. Ó thaobh na hoibríochta de, mhol an Coimisiún gur cheart íosleibhéal comhchuibhithe chaighdeán TLAC do G-SIIanna ('íoscheanglas TLAC') a thabhairt isteach i reachtaíocht an Aontais trí leasuithe ar Rialachán (AE) Uimh. 575/2013 ó Pharlaimint na hEorpa agus ón gComhairle⁵, agus ba cheart aghaidh a thabhairt ar an bhforlíontán institiúid-sonrach do G-SIIanna agus ar an gceanglas institiúid-sonrach d'eintitis nach G-SIIanna iad, le leasuithe spriocdhírthe ar Threoir 2014/59/AE agus ar Rialachán (AE) Uimh. 806/2014 ó Pharlaimint na hEorpa agus ón gComhairle⁶. Tá forálacha ábhartha na Treorach seo maidir le hionstraimí fiachais neamhurraithe a rangú in ordlathas dócmhainneachta ina gcomhlánú orthu sin atá sna píosaí reachtaíochta thuasluaite agus i dTreoir 2013/36/AE⁷.

⁴ Treoir 2014/59/AE ó Pharlaimint na hEorpa agus ón gComhairle an 15 Bealtaine 2014 lena mbunaítear creat do théarnamh agus do réiteach institiúidí creidmheasa agus gnólachtaí infheistíochta agus lena leasaítear Treoir 82/891/CEE ón gComhairle agus Treoracha 2001/24/CE, 2002/47/CE, 2004/25/CE, 2005/56/CE, 2007/36/CE, 2011/35/AE, 2012/30/AE agus 2013/36/AE, agus Rialachán (AE) Uimh. 1093/2010 agus Rialachán (AE) Uimh. 648/2012, IO L 173, 12.6.2014, lch. 190

⁵ Rialachán (AE) Uimh. 575/2013 ó Pharlaimint na hEorpa agus ón gComhairle an 26 Meitheamh 2013 maidir le ceanglais stuamachta i gcomhair institiúidí creidmheasa agus gnólachtaí infheistíochta agus lena leasaítear Rialachán (AE) Uimh. 648/2012, IO L 176, 27.6.2013, lch. 1

⁶ Rialachán (AE) Uimh. 806/2014 ó Pharlaimint na hEorpa agus ón gComhairle an 15 Iúil 2014 lena mbunaítear rialacha aonfhoirmeacha agus nós imeachta aonfhoirmeach maidir le réiteach institiúidí creidmheasa agus gnólachtaí infheistíochta áirithe faoi chuimsiú Sásra Réitigh Aonair agus Ciste Réitigh Aonair agus lena leasaítear Rialachán (AE) Uimh. 1093/2010, IO L 225, 30.7.2014, lch. 1

⁷ Treoir 2013/36/AE ó Pharlaimint na hEorpa agus ón gComhairle an 26 Meitheamh 2013 maidir le rochtain ar ghníomhaíocht institiúidí creidmheasa agus maoirseacht stuamachta ar institiúidí creidmheasa agus ar ghnólachtaí infheistíochta, lena leasaítear Treoir 2002/87/CE agus lena n-aisghairtear Treoir 2006/48/CE agus Treoir 2006/49/CE, IO L 176, 27.6.2013, lch. 338

(3) Ba cheart do na Ballstáit a áirithiú go mbeadh cumas leordhóthanach ionsúcháin caillteanais agus cumas leordhóthanach athchaipitliúcháin ag institiúidí chun a áirithiú go n-ionsúfaí na caillteanais agus go ndéanfaí athchaipitliú go mín agus go tapúil ionas go mbeadh an tionchar is lú is féidir ar chobhsaíocht airgeadais agus ar cháiniocóirí. Chun é sin a dhéanamh ba cheart d'institiúidí íoscheanglas TLAC a chomhlíonadh go seasta, ar íoscheanglas é a chuirfear chun feidhme i ndlí an Aontais trí leasú a dhéanamh ar Rialachán (AE) Uimh. 575/2013 agus trí cheangaltas maidir le cistí dílse agus dliteanais incháilithe dá bhforáiltear i dTreoir 2014/59/AE.

(4) Le caighdeán TLAC, a chuirfear chun feidhme i ndlí an Aontais trí leasú a dhéanamh ar Rialachán (AE) Uimh. 575/2013, cuirfear de cheangal ar G-SIIanna íoscheanglas TLAC a chomhlíonadh, ach amháin i gcás eisceachtaí áirithe, trí bhíthin dliteanais fho-ordaithe ag a bhfuil rang níos ísle i dtaca le dócmhainneacht ná mar atá ag dliteanais atá eisiata ó TLAC ('ceanglas fo-ordúcháin'). Faoi chaighdeán TLAC, ba cheart fo-ordú a chur i gcrích trí éifeachtaí dlíthiúla conartha ('fo-ordú conarthach'), trí dhlíthe dlínse ar leith ('fo-ordú reachtúil') nó trí struchtúr corparáideach ar leith ('fo-ordú struchtúrach'). I gcás ina gceanglaítear é le Treoir 2014/59/AE, ba cheart d'institiúidí laistigh dá raon feidhme a gceanglas gnólacht-sonrach a chomhlíonadh trí bhíthin dliteanais fho-ordaithe chun go laghdófaí an riosca go ndéanfadh creidiúnaithe agóid dhlíthiúil ar bhonn go bhfuil a gcuid caillteanas i gcás réitigh níos airde ná na caillteanais a thabhóidís de réir gnáthimeachtaí dócmhainneachta (an prionsabal nach mbeidh creidiúnaí ar bith níos measa as).

(5) Tá roinnt Ballstát tar éis an rangú dócmhainneachta maidir le fiachas sinsearach neamhurráithe faoina ndlí dócmhainneachta náisiúnta a leasú, sin nó tá siad i mbun a leasaithe chun go bhféadfaidh institiúidí dá gcuid ceanglas fo-ordúcháin a chomhlíonadh ar bhealach níos éasca agus, ar an gcaoi sin, imeachtaí réitigh a éascú.

(6) Tá na rialacha náisiúnta a glacadh go dtí seo an-éagsúil óna chéile. In éagmais rialacha comhchuibhithe ar leibhéal an Aontais, tá neamhchinnteacht ann d'institiúidí eisiúna agus d'infheisteoirí araon agus d'fhéadfadh go mbeadh sé ní ba dheacra an uirlis fortharrthála le haghaidh institiúidí trasteorann a chur i bhfeidhm. D'fhéadfadh go dtiocfadh saobhadh iomaíochta sa mhargadh inmheánach chun cinn freisin ar an ábhar go bhféadfadh éagsúlacht mhór a bheith idir na costais a chuirfí ar na h-institiúidí i dtaca leis an gceanglas fo-ordúcháin a chomhlíonadh agus na costais a bheadh ar infheisteoirí agus iad ag ceannach ionstraimí fiachais arna n-eisiúint ag institiúidí ar fud an Aontais.

(7) Sa tuarascáil uaithi ar an aontas baincéireachta, d'iarr Parlaimint na hEorpa ar an gCoimisiún tograí a thíolacadh chun rioscaí dlíthiúla na n-éileamh a laghdú tuilleadh faoin bprionsabal nach mbeadh creidiúnaí ar bith níos measa as, agus, sna conclúidí uaithi an 17 Meitheamh 2016⁸, thug an Chomhairle cuireadh don Choimisiún togra a chur ar aghaidh maidir le cur chuige coiteann i dtaca le hordlathas creidiúnaithe bainc chun deimhneacht dhlíthiúil a fheabhsú i gcás réitigh.

(8) Is den riachtanas, dá bhrí sin, deireadh a chur leis na bacainní suntasacha ar fheidhmiú an mhargaidh inmheánaigh, agus an saobhadh iomaíochta a sheachaint a thiocfadh chun cinn in éagmais rialacha comhchuibhithe ar leibhéal an Aontais maidir le hordlathas creidiúnaithe bainc agus cosc a chur ar bhacainní agus ar shaobhadh den chineál sin amach anseo. Dá réir sin, ba cheart gurbh é Airteagal 114 den Chonradh ar Fheidhmiú an Aontais Eorpaigh (CFAE) an bunús dlí iomchuí don Treoir seo, mar a léirmhínítear é i gcomhréir le cásdlí Chúirt Bhreithiúnais an Aontais Eorpaigh.

⁸ Conclúidí ón gComhairle an 17 Meitheamh 2016 maidir le treochlár chun an t-aontas baincéireachta a chomhlánú: http://www.consilium.europa.eu/press-releases-pdf/2016/6/47244642837_ga.pdf

(9) D'fhonn na costais maidir le comhlíonadh an cheanglais fo-ordúcháin agus aon tionchar diúltach ar chostais chistiúcháin a laghdú a oiread is féidir, ba cheart, leis an Treoir seo, a cheadú seo do na Ballstáit, i gcás inarb infheidhme, an aicme atá ann cheana a choinneáil de ghnáthfhiachas sinsearach neamhurraithe, dliteanas is lú costas d'institiúidí a eisiúint ná aon dliteanais fho-ordaithe eile. D'fhonn feabhas a chur ar inréiteacht na n-institiúidí, ba cheart, leis an Treoir seo, mar sin féin, ceangal a chur ar na Ballstáit aicme nua d'fhiachas sinsearach 'neamhthosaíochta' a chruthú ba cheart a rangú i gcás dócmhainneachta roimh ionstraimí cistí dílse agus roimh dhliteanais fho-ordaithe seachas ionstraimí breise leibhéal 1 agus leibhéal 2, agus tar éis dliteanais shinsearacha eile. Gan dochar do roghanna eile dá bhforáiltear le caighdeán TLAC chun an ceanglas fo-ordúcháin a chomhlíonadh, ba cheart d'institiúidí leanúint de bheith saor fiachas a eisiúint in aicmí sinsearacha agus in aicmí sinsearacha 'neamhthosaíochta' araon agus, i gcás an dá aicme sin, níor cheart ach an aicme shinsearach 'neamhthosaíochta' a bheith incháilithe chun an ceanglas fo-ordúcháin a chomhlíonadh. Ba cheart go lamhálfadh sé sin do na hinstiúidí úsáid a bhaint as an ngnáthfhiachas sinsearach is lú costas maidir lena gcistiú féin nó ar chúiseanna oibríochtúla eile le linn dóibh fiachas a eisiúint san aicme nua shinsearach 'neamhthosaíochta' chun cistiú a fháil agus an ceanglas fo-ordúcháin a chomhlíonadh. Ba cheart cead a bheith ag na Ballstáit roinnt aicmí a chruthú i gcomhair gnáthdhliteanais neamhurraithe eile, ar choinníoll go n-áiritheoidh siad nach bhfuil ach an aicme shinsearach d'ionstraimí fiachais 'neamhthosaíochta' incháilithe chun an ceanglas fo-ordúcháin a chomhlíonadh.

(10) Chun a áirithiú go gcomhlíonann an aicme nua shinsearach d'ionstraimí fiachais 'neamhthosaíochta' na critéir incháilitheachta mar a thuairiscítear i gcaighdeán TLAC agus a leagtar amach i dTreoir 2014/59/AE, agus ar an gcaoi sin, go ndéanfar an deimhneacht dhlíthiúil a fheabhsú, ba cheart do na Ballstáit a áirithiú go bhfuil bliain amháin ar a laghad d'aibíocht chonarthach ag na hionstraimí fiachais, agus nach díorthaigh iad agus nach bhfuil díorthaigh leabaithe acu agus, sa doiciméadacht chonarthach ábhartha a bhaineann lena n-éisiúint, go dtagraítear go sonrach dá rangú de réir gnáthimeachtaí dócmhainneachta. Go háirithe, ionstraimí fiachais ar ráta úis athraitheach, a dhíorthaítear ó ráta tagartha a úsáidtear go forleathan, ar nós Euribor nó Libor, níor cheart a mheas gur ionstraimí fiachais iad ag a bhfuil díorthaigh leabaithe ar an ábhar sin amháin. Níor cheart gur dhochar an Treoir seo d'aon cheanglas i reachtaíocht náisiúnta chun ionstraimí fiachais a chlárú i gclárlann dliteanas na cuideachta den eistheoir chun na coinníollacha le haghaidh aicme shinsearach d'ionstraimí fiachais neamhthosaíochta a chomhlíonadh, dá bhforáiltear sa Treoir seo.

(11) D'fhonn an deimhneacht dhlíthiúil a fheabhsú d'infheisteoirí, ba cheart do na Ballstáit a áirithiú gurb airde an rangú tosaíochta a bheidh ag gnáthionstraimí fiachais shinsearaigh agus ag ghnáthdhliteanais shinsearacha neamhurraithe eile nach ionstraimí fiachais iad sna dlíthe dócmhainneachta náisiúnta atá acu ná mar a bheidh ag an aicme nua shinsearach d'ionstraimí fiachais 'neamhthosaíochta'. Ba cheart do na Ballstáit a áirithiú freisin gurb airde an rangú tosaíochta a bheidh ag an aicme nua shinsearach d'ionstraimí fiachais 'neamhthosaíochta' ná mar a bheidh ag ionstraimí cistí dílse agus aon dliteanais fho-ordaithe seachas ionstraimí chaipiteal breise leibhéal 1 agus leibhéal 2.

(12) Ós rud é nach féidir leis na Ballstáit cuspóirí na Treorach seo, eadhon rialacha comhchuibhithe a leagan síos i ndáil le rangú dócmhainneachta a dhéanamh ar ionstraimí fiachais neamhurráithe chun críocha chreat téarnaimh agus réitigh an Aontais, a ghnóthú go leordhóthanach agus de bharr fhairsinge na gníomhaíochta, gur fearr is féidir iad a ghnóthú ar leibhéal an Aontais, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Treoir seo thar a bhfuil riachtanach chun na cuspóirí sin a ghnóthú. Go háirithe, níor cheart gur dhochar an Treoir seo do roghanna eile dá bhforáiltear i gcaighdeán TLAC chun an ceanglas fo-ordúcháin a chomhlíonadh.

(13) Is iomchuí go mbeidh feidhm ag leasuithe ar Threoir 2014/59/AE dá bhforáiltear sa Treoir seo maidir le héilimh neamhurráithe de thairbhe ionstraimí fiachais arna n-eisiúint ar dháta chur i bhfeidhm na Treorach seo agus tar a éis sin. Mar sin féin, chun críocha na cinnteachta dlíthiúla agus chun costais aistrithe a mhaolú a mhéid is féidir, ba cheart don Bhallstát a áirithiú go mbeidh rangú dócmhainneachta gach éilimh neamhurráithe gan íoc de thairbhe ionstraimí fiachais a d'eisigh institiúidí roimh an dáta sin faoi rialú dhlíthe na mBallstát mar a glacadh ar an 31 Nollaig 2016 iad. A mhéid a bhféadfadh dlíthe áirithe náisiúnta, mar a glacadh ar an 31 Nollaig 2016 iad, aghaidh a bheith tugtha acu cheana ar an gcuspóir atá ann a chur ar chumas institiúidí dliteanais fho-ordaithe a eisiúint, féadfaidh an rangú céanna dócmhainneachta a bheith ag cuid de na héilimh neamhurráithe gan íoc de thairbhe ionstraimí fiachais arna n-eisiúint roimh dháta chur i bhfeidhm na Treorach seo nó acu sin ar fad, agus atá ag ionstraimí fiachais shinsearaigh 'neamhthosaíochta' a eisítear faoi choinníollacha na Treorach seo. Sa bhreis air sin, féadfaidh na Ballstáit, tar éis an 31 Nollaig 2016 agus roimh dháta theacht i bhfeidhm na Treorach seo, a ndlíthe náisiúnta a oiriúnú lena rialaítear an rangú i ngnáthimeachtaí dócmhainneachta maidir le héilimh neamhurráithe de thairbhe ionstraimí fiachais a eisíodh tar éis dháta chur i bhfeidhm na ndlíthe sin chun na coinníollacha a leagtar síos sa Treoir seo a chomhlíonadh. Sa chás sin, níor cheart ach na héilimh neamhurráithe de thairbhe na n-ionstraimí fiachais a eisíodh roimh chur i bhfeidhm an dlí nua náisiúnta sin leanúint de bheith faoi rialú dhlíthe na mBallstát mar a glacadh ar an 31 Nollaig 2016 iad.

(14) Níor cheart an Treoir seo bac a chur ar na Ballstáit foráil a dhéanamh go leanfadh an Treoir seo d'fheidhm a bheith aici nuair nach bhfuil eintitis eisiúna faoi réir chreat réitigh an Aontais a thuilleadh, go háirithe, mar thoradh ar dhífheistiú a gcreidmheasa nó gníomhaíochtaí infheistíochta le tríú páirtí.

(15) Leis an Treoir seo comhchuibhítear an rangú de réir gnáthimeachtaí dócmhainneachta maidir le héilimh neamhurráithe de thairbhe ionstraimí fiachais agus ní chumhdaítear an rangú dócmhainneachta i dtaca le taiscí thar na forálacha is infheidhme atá ann cheana de Threoir 2014/59/AE. Dá bhrí sin, ní dochar an Treoir seo do dhlíthe náisiúnta na mBallstát lena rialaítear gnáthimeachtaí dócmhainneachta lena gcumhdaítear an rangú dócmhainneachta i dtaca le taiscí nach gcomhchuibhítear le Treoir 2014/59/AE. Faoin *[dáta – 3 bliana tar éis dháta theacht i bhfeidhm na Treorach seo]*, ba cheart don Choimisiún athbhreithniú a dhéanamh ar Threoir 2014/59/CE maidir le rangú na dtaiscí i gcás dócmhainneachta agus measúnú a dhéanamh go háirithe ar an ngá a bheidh le tuilleadh leasuithe a dhéanamh orthu.

Airteagal 1

Leasuithe ar Threoir 2014/59/AE

1. In Airteagal 2(1), cuirtear an méid seo a leanas in ionad phointe (48):

"(48) 'ionstraimí fiachais':

- (i) chun críche phointe (g) agus phointe (j) d'Airteagal 63(1), ciallaíonn 'ionstraimí fiachais' bannaí agus cineálacha eile fiachais inaistrithe, ionstraimí lena gcruthaítear nó lena n-aithnítear fiachas, agus ionstraimí lena dtugtar cearta chun ionstraimí fiachais a fháil; agus
- (ii) chun críche Airteagal 108, ciallaíonn 'ionstraimí fiachais' bannaí agus cineálacha eile fiachais inaistrithe agus ionstraimí lena gcruthaítear nó lena n-aithnítear fiachas."

2. Cuirtear an méid seo a leanas in ionad Airteagal 108:

"Airteagal 108

Rangú in ordlathas dócmhainneachta

1. Áiritheoidh na Ballstáit, sa dlí náisiúnta lena rialaítear gnáthimeachtaí dócmhainneachta:
 - (a) go mbeidh an rangú tosaíochta céanna, arb airde é ná an rangú a sholáthraítear do na héilimh ghnáthchreidiúnaithe neamhurraithe, ag an méid seo a leanas:
 - (i) an chuid sin de thaiscí incháilithe ó dhaoine nadúrtha agus ó mhicreaghnóthais, gnóthais bheaga agus gnóthais mheánmhéide a sháraíonn an leibhéal cumhdaigh dá bhforáiltear in Airteagal 6 de Threoir 2014/49/AE;
 - (ii) taiscí a bheadh ina dtaiscí incháilithe ó dhaoine nadúrtha agus ó mhicreaghnóthais, gnóthais bheaga agus gnóthais mheánmhéide murach gur taisceadh iad trí bhraintí a bhí suite lasmuigh den Aontas ó institiúidí atá suite laistigh den Aontas.
 - (b) tá an rangú tosaíochtaí céanna, arb airde é ná an rangú dá bhforáiltear faoi phointe (a) ag an méid seo a leanas:
 - (i) taiscí cumhdaithe;
 - (ii) scéimeanna ráthaithe taiscí a dhéanann seachaíocht ar chearta agus oibleagáidí taisceoirí cumhdaithe i gcás dócmhainneachta.

2. Áiritheoidh na Ballstáit, i gcás eintitis dá dtagraítear i bpointí (a), (b), (c) agus (d) d'Airteagal 1(1), gurb airde an rangú tosaíochta a bheidh ag gnáthéilimh neamhurraithe, sa dlí náisiúnta lena rialaítear gnáthimeachtaí dócmhainneachta, ná mar a bheidh ag éilimh neamhurraithe de thairbhe ionstraimí fiachais lena gcomhlíontar na coinníollacha seo a leanas:
- (a) bliain ar a laghad atá in aibíocht chonarthach bhunaidh na n-ionstraimí fiachais;
 - (b) ní díorthaigh iad ná níl díorthaigh leabaithe acu; agus,
 - (c) tagraítear go sonrach sa doiciméadacht chonarthach ábhartha agus, i gcás inarb infheidhme, sa réamheolaire a bhaineann le heisiúint don rangú níos ísle faoin mír seo.
3. Áiritheoidh na Ballstáit gurb airde an rangú tosaíochta a bheidh sa dlí náisiúnta lena rialaítear gnáthimeachtaí dócmhainneachta, ag éilimh neamhurraithe de thairbhe ionstraimí fiachais a chomhlíonann na coinníollacha a leagtar síos i bpointe (a), pointe (b) agus pointe (c) de mhír 2, ná mar a bheidh ag éilimh neamhurraithe de thairbhe ionstraimí dá dtagraítear i bpointe (a) agus pointe (d) d'Airteagal 48(1).
4. Gan dochar do mhír 5 ná do mhír 6, áiritheoidh na Ballstáit go mbeidh feidhm ag a ndlíthe náisiúnta lena rialaítear gnáthimeachtaí dócmhainneachta, mar a glacadh ar an 31 Nollaig 2016 iad, maidir leis an rangú i ngnáthimeachtaí dócmhainneachta i dtaca le héilimh neamhurraithe de thairbhe ionstraimí fiachais arna n-eisiúint ag eintitis dá dtagraítear i bpointí (a), (b), (c) agus (d) d'Airteagal 1(1), roimh an dáta a dtiocfaidh bearta faoin dlí náisiúnta i bhfeidhm lena dtrasúitear [*cuir isteach teideal na Treorach seo*].

5. I gcás inar ghlac Ballstát, tar éis an 31 Nollaig 2016 agus roimh dháta theacht i bhfeidhm *[cuir isteach teideal na Treorach seo]*, dlí náisiúnta lena rialaítear an rangú i ngnáthimeachtaí dócmhainneachta i dtaca le héilimh neamhurraithe de thairbhe ionstraimí fiachais arna n-eisiúint tar éis dháta theacht i bhfeidhm dlí náisiúnta den sórt sin, ní bheidh feidhm ag mír 4 maidir le héilimh de thairbhe ionstraimí fiachais arna n-eisiúint tar éis theacht i bhfeidhm an dlí náisiúnta sin ar choinníoll go gcomhlíontar an méid seo a leanas:

(a) go bhforáiltear sa dlí náisiúnta, maidir le heintitis dá dtagraítear i bpointí (a), (b), (c) agus (d) d'Airteagal 1(1), gurb airde an rangú tosaíochta a bheidh ag gnáthéilimh neamhurraithe, i ngnáthimeachtaí dócmhainneachta, ná mar a bheidh ag éilimh neamhurraithe de thairbhe ionstraimí fiachais a chomhlíonann na coinníollacha seo a leanas:

- (i) bliain ar a laghad atá in aibíocht chonarhach bhunaidh na n-ionstraimí fiachais;
- (ii) ní díorthaigh iad ná níl díorthaigh leabaithe acu; agus
- (iii) tagraítear go sonrach sa doiciméadacht chonarhach ábhartha agus, i gcás inarb infheidhme, sa réamheolaire a bhaineann le heisiúint don rangú níos ísle faoin mír seo;

(b) go bhforáiltear sa dlí náisiúnta gurb airde an rangú tosaíochta a bheidh ag éilimh neamhurraithe de thairbhe ionstraimí fiachais a chomhlíonann na coinníollacha a leagtar síos i bpointe (a) den mhír seo, i ngnáthimeachtaí dócmhainneachta, ná mar a bheidh ag éilimh de thairbhe ionstraimí dá dtagraítear i bpointí (a) go (d) d'Airteagal 48(1).

Ar an dáta a dtiocfaidh bearta faoin dlí náisiúnta i bhfeidhm lena trasúitear *[cuir isteach teideal na Treorach seo]*, beidh an rangú tosaíochta céanna ag na héilimh neamhurraithe de thairbhe ionstraimí fiachais dá dtagraítear i bpointe (b), agus atá ag an gceann dá dtagraítear i bpointe (a), pointe (b) agus pointe (c) de mhír 2 agus i mír 3.

6. I gcás na mBallstát, inar glacadh roimh an 31 Nollaig 2016 dlí náisiúnta lena rialaítear gnáthimeachtaí dócmhainneachta, ina ndéantar éilimh neamhurráithe de thairbhe ionstraimí fiachais arna n-eisiúint ag eintitis dá dtagraítear i bpointí (a), (b), (c) agus (d) d'Airteagal 1(1) a roinnt ina dhá rangú tosaíochta éagsúla nó níos mó, nó i gcás ina n-athraítear an rangú tosaíochta maidir le héilimh neamhurráithe de thairbhe ionstraimí fiachais i dtaca le gach gnáthéileamh neamhurráithe eile den rangú céanna, féadfaidh siad foráil a dhéanamh go bhfuil an rangú céanna ag ionstraimí fiachais ag a bhfuil an rangú tosaíochta is ísle i measc na n-éileamh neamhurráithe agus atá ag ceann de na héilimh a chomhlíonann na coinníollacha de mhír 2 (a), (b) agus (c) agus de mhír 3.

Airteagal 2

Trasuí

1. Déanfaidh na Ballstáit na dlíthe, rialacháin agus forálacha riaracháin is gá chun an Treoir seo a chomhlíonadh a thabhairt i bhfeidhm faoin *[18 mí amhail ón dáta theacht i bhfeidhm na Treorach seo]*. Cuirfidh siad an Coimisiún ar an eolas faoi sin láithreach.
- Déanfaidh na Ballstáit na bearta sin a chur i bhfeidhm an dáta a dtiocfaidh siad i bhfeidhm sa dlí náisiúnta, rud a tharlóidh tráth nach déanaí ná *[18 mí amhail ón dáta theacht i bhfeidhm na Treorach seo]*.
2. Nuair a ghlacfaidh na Ballstáit na bearta dá dtagraítear i mír 1, beidh tagairt iontu don Treoir seo nó beidh tagairt den chineál sin ag gabháil leo tráth a bhfoilsithe hoifigiúil. Is iad na Ballstáit a leagfaidh síos an bealach a ndéanfar tagairt den sórt sin.

- 2a. Ní bheidh feidhm ag mír 2 i gcás ina gcomhlíonann bearta náisiúnta na mBallstát, atá i bhfeidhm roimh dháta theacht i bhfeidhm na Treorach seo, an Treoir seo. Sa chás sin, tabharfaidh na Ballstáit fógra don Choimisiún dá réir sin.
3. Déanfaidh na Ballstáit téacs phríomhbhearta an dlí náisiúnta a ghlacfaidh siad sa réimse a chumhdaítear leis an Treoir seo a chur in iúl don Choimisiún agus don Údarás Baincéireachta Eorpach.

Airteagal 2a

Athbhreithniú

Faoi *[dáta – 3 bliana amhail ón dáta theacht i bhfeidhm na Treorach seo]*, déanfaidh an Coimisiún athbhreithniú ar chur i bhfeidhm Airteagal 108(1) de Threoir 2014/59/AE. Déanfaidh an Coimisiún measúnú go háirithe ar an ngá a bheidh le tuilleadh leasuithe maidir le taiscí i gcás dócmhainneachta a rangú. Cuirfidh an Coimisiún tuarascáil faoi sin faoi bhráid Pharlaimint na hEorpa agus na Comhairle.

Airteagal 3
Teacht i bhfeidhm

Tiocfaidh an Treoir seo i bhfeidhm an fichiú lá tar éis lá a foilsithe in Iris Oifigiúil an Aontais Eorpaigh.

Airteagal 4
Seolaithe

Dírítear an Treoir seo chuig na Ballstáit.

Arna dhéanamh sa Bhruiséil,

Thar ceann Pharlaimint na hEorpa *Thar ceann na Comhairle*

An tUachtarán *An tUachtarán*
